

11
ԴԵԿՏԵՄԲԵՐ
2025



**ԱՊԱՇԵՆՈՐՀ ԱՃՊԱՐԱՐՈՒԹՅՈՒՆ
ԿԱՄ ԼԵՈՒ ԵՐԿՆԵՑ ՈՒ ՄՈՒԿ ԾՆԵՑ.
ԿԱՌԱՎԱՐՈՒԹՅԱՆ ՀՐԱՊԱՐԱԿԱԾ
ԻՆՔՆԱՈՉՆՉԱՑՄԱՆ «ՓԱՍՏԱԹՂԹԵՐԸ»**

ԱՊԱՇՆՈՐՀ ԱՃՊԱՐԱՐՈՒԹՅՈՒՆ ԿԱՄ ԼԵՌԸ ԵՐԿՆԵՑ ՈՒ ՄՈՒԿ ԾՆԵՑ. ԿԱՌԱՎԱՐՈՒԹՅԱՆ ՀՐԱՊԱՐԱԿԱԾ ԻՆՔՆԱՌՉՆԱՑՄԱՆ «ՓԱՍՏԱԹՂԹԵՐԸ»

Տիգրան Թորոսյան

Քաղաքական գիտությունների դոկտոր, պրոֆեսոր



Դեկտեմբերի 2-ին կառավարության կայքում «Ղարաբաղյան հակամարտության կարգավորման բանակցային գործընթացի փասաթղթեր» խորագրի ներքո տեղադրվել են 13 «փաստաթղթեր»: Քանի որ դրանց հետ որևէ ուղեկից բացատրագիր-մեկնաբանություն չի հրապարակվել, կարելի է ենթադրել, որ դա այն հրապարակումն է, որը խոստացել էր անել կառավարության ղեկավարը՝ ապացուցելու համար իր պնդումների ճշմարտացիությունը Ղարաբաղյան հակամարտության կարգավորման գործընթացի վերաբերյալ: Դրանցից հիմնականները հետևյալներն էին՝

- 1) բանակցային փաստաթղթերում միշտ նշվել է Արցախի պատկանելությունը Ադրբեջանին,
- 2) բանակցային փաստաթղթերում նշվել է, որ Շուշին վերադարձվելու է Ադրբեջանին,
- 3) բանակցային փաստաթղթերում ինքնորոշման իրավունքը նշվել է Ադրբեջանի տարածքային ամբողջականության ներքո,
- 4) բանակցային փաստաթղթերում Արցախի կարգավիճակի վերաբերյալ հանրաքվեն պետք է տեղի ունենար ոչ միայն Արցախում, այլ նաև Ադրբեջանի ողջ տարածքում,
- 5) իրենք ժառանգել են տապալված գործընթաց, այդ պատճառով մերժել են այն ի սկզբանե և այլն:

Իհարկե, առանց այդ հրապարակման էլ կարգավորման գործընթացին տեղյակ, անհրաժեշտ գիտելիքներ ունեցող ամեն մեկի համար վաղուց պարզ էր, որ

այդ պնդումները զուրկ են որևէ հիմքից ու փաստաթղթերի և գործընթացի թյուրընկալումների հետևանք: Եղել են հրապարակումներ (օրինակ՝ Թորոսյան Տ., ԼՂ հակամարտության կարգավորման գործընթացի փուլերը, իրավիճակն ու հեռանկարները,

<https://www.luys.am/img/artpic/small/719d9a46a82fdcab7573LՂԳործընթաց.pdf>;

Թորոսյան Տ., 2020թ. պատերազմ. Նախադրյալները, հետևանքները և աղետի հաղթահարման հնարավորությունները,

<https://luys.am/img/artpic/small/17421d60c00deb99e93e2020Թ.-ՊԱՏԵՐԱԶՄ.->

ՆԱԽԱԴՐՅԱԼՆԵՐԸ-ՀԵՏԵՎԱՆՔՆԵՐԸ-ԵՎ-ԱՂԵՏԻ-

ՀԱՂԹԱՀԱՐՄԱՆ ՀՆԱՐԱՎՈՐՈՒԹՅՈՒՆՆԵՐԸ.pdf.), որոնք, մանրամասն հիմնավորումներով, փաստաթղթերի հիման վրա մասնագիտորեն ապացուցել են, որ այդ պնդումներն անհիմն են, կեղծիք են ու աճապարարություն կամ առնվազն տգիտության հետևանք: Այդուհանդերձ, քանի որ այդ «փաստաթղթերը» հրապարակվել են՝ իբր հիմնավորելու համար այդ պնդումները, անհրաժեշտ է ընթերցողին ցույց տալ այդ ամենը՝ հենց հրապարակված փաթեթի հիման վրա:

Փաթեթը պատրաստողների գիտելիքների պակասի մասին է խոսում այն փաստը, որ դրանում եղած 13 նյութերից 4-ը չեն կարող փաստաթուղթ կոչվել: Որպես այդպիսին են ներկայացվել Ազգային ժողովում տեղի ունեցած հարց ու պատասխանից մի հատված, մի օրաթերթի հրապարակում, Ռուսաստանի նախագահին ուղղված մի նամակ ու փոփոխությունների մի առաջարկ՝ առանց հիմնական փաստաթղթի, որին դա վերաբերում է: Իհարկե, այդ նյութերում էլ բացակայում է վերոհիշյալ պնդումների հավաստիությունը վկայող որևէ բան, սակայն պնդումների հարցը քննարկելիս հարկ է մանրամասն անդրադառնալ հենց փաստաթղթերի ու նման կարգավիճակ չունեցող այլ նյութեր պետք է մի կողմ թողնել: Ավելին, ժամանակավրեպ է 4 փաստաթղթերի հրապարակումը, որոնք վերաբերում են առաջին նախագահի պաշտոնավարման ժամանակահատվածին, քանի որ այդ ընթացքում բանակցությունները տեղի էին ունենում բոլորովին այլ սկզբունքների հիման վրա ու այսօրվա իշխանությունների վերոհիշյալ պնդումների հետ ոչ մի կապ չունեն: Ինքնորոշման իրավունքի ամրագրումը՝ որպես Արցախի քաղաքական կարգավիճակի որոշման սկզբունք, տեղի է ունեցել 2005 թվականի Եվրոպայի խորհրդի խորհրդարանական վեհաժողովի 1416 բանաձևով և դրա առաջարկի հիման վրա՝ Եվրոպայի խորհրդի նախարարների կոմիտեի արձագանքով: Ավելի ուշ՝ 2007 թվականի նոյեմբերին, այդ սկզբունքը դարձել է Մինսկի խմբի համանախագահների ներկայացրած բանակցային փաստաթղթի նոր տարբերակի՝ Մադրիդյան սկզբունքների մաս: Հետևաբար, պնդումների իսկության տեսակետից փաստաթղթերը պետք է դիտարկել այդ ժամանակից սկսած: Այսպիսով, այդ պնդումների իսկության հետ առնչվում են այդ փաթեթում ընդգրկված ընդամենը 5 փաստաթուղթ՝ 2007 թվականի Հիմնական սկզբունքները (որը հետո

կոչվեց Մադրիդյան սկզբունքներ, քանի որ ներկայացվել էր Մադրիդում) ներառող առաջին փաստաթուղթը, 2011 թվականի Կազանյան փաստաթուղթը, Ռուսաստանի 2014 թվականի առաջարկությունները, 2016 թվականի փաթեթը և 2019 թվականի հունիսի փաթեթը: Ավելին, էական է դիտարկել 2007 և 2019 թվականների փաստաթղթերը (ստորև ցույց կտրվի, որ վերջինը գործնականում նույնական է 2016 թվականի փաստաթղթի հետ), քանի որ առաջինը ինքնորոշման իրավունքի կիրառման վերաբերյալ առաջին բանակցային փաստաթուղթն է, իսկ վերջինը՝ այն փաստաթուղթը, որը Հայաստանի ներկայիս իշխանությունները մերժել են, հայտարարել են որ սկսում են սեփական կետից՝ արհամարհելով Մինսկի խմբի համանախագահներ, ՄԱԿ-ի Անվտանգության խորհրդի երեք անդամների 13 տարվա ջանքերը: Ակնհայտ է, որ նման անմիտ ու ամբարտավան պահվածքը տապալել է բանակցային գործընթացը:

Միջանկյալ երեք փաստաթղթերին մանրամասն անդրադառնալու կարիք չկա, քանի որ կառավարության ղեկավարի պնդումների տեսակետից առանցքային են այն ձևակերպումները, որոնք առկա են Արցախի ինքնորոշմանը վերաբերող առաջին և վերջին բանակցային փաստաթղթերին՝ 2007 թվականի Մադրիդյան սկզբունքներին ու 2019 թվականի փաթեթին: Այդ փաստաթղթերը ճիշտ ընկալելու համար անհրաժեշտ է գիտելիքներ ունենալ հակամարտությունների կարգավորման հիմնարար փաստաթղթերի մասին՝ «ՄԱԿ-ի կանոնադրություն», «Քաղաքական և քաղաքացիական իրավունքների մասին հռչակագիր», «ՄԱԿ-ի կանոնադրության հիման վրա պետությունների միջև բարեկամական հարաբերությունների և համագործակցության վերաբերյալ միջազգային իրավունքի սկզբունքների մասին հռչակագիր», «ԵԱՀԿ հելսինկյան եզրափակիչ ակտ», որոնք սահմանում են հրապարակված փաստաթղթերում օգտագործվող նորմերի ու մեխանիզմների էությունը:

Պնդումների ու փաստաթղթերի համապատասխանության վերաբերյալ ստացվում է հետևյալ պատկերը:

Հիմնական սկզբունքներ (2007 թվականի փաստաթուղթ)

Պնդում 1.

Բանակցային փաստաթղթերում միշտ նշվել է Արցախի պարկանելությունը Ադրբեջանին:

Այս փաստաթղթի հենց սկզբում նշվում է, որ Լեռնային Ղարաբաղի հակամարտության կարգավորման սկզբունքները հիմնված են միջազգային իրավունքի հիմնարար փաստաթղթերով սահմանված երեք սկզբունքների վրա՝ ուժի

և ուժի սպառնալիքների չկիրառման, պետությունների տարածքային ամբողջականության և ժողովուրդների իրավահավասարության և ինքնորոշման: Միջազգային իրավունքի վերաբերյալ տարրական գիտելիքներ ունեցող ցանկացած մարդ կհասկանա, որ հակամարտության երեք կողմերից՝ ինքնորոշվելու խնդիր ուներ միայն Արցախը: Միջազգային իրավունքը սահմանում է նաև, որ ինքնորոշում նշանակում է ինքնուրույն որոշել սեփական քաղաքական կարգավիճակը: Հետևաբար ակնհայտ է, որ ինքնորոշվող Արցախը չէր կարող պատկանել Ադրբեջանին: Ավելին, դրանից հետո սահմանվում են խնդրի կարգավորման Խաղաղության համաձայնագրի սկզբունքները, որոնցից առաջին երկուսը վերաբերում են Արցախի վերջնական և միջանկյալ կարգավիճակներին: Առաջինը սահմանում է, որ վերջնական կարգավիճակը պետք է որոշվի Լեռնային Ղարաբաղի բնակչության կամքի ազատ արտահայտման պլեբեցիտով (փաթեթում ընդգրկված մյուս փաստաթղթերում՝ 2011թվականի Կազանի փաստաթղթից սկսած, «պլեբեցիտ» բառը փոխարինվել է «համաժողովրդական քվեարկություն» արտահայտությամբ՝ տարակարծությունից խուսափելու նպատակով), որ քվեարկության դրվող հարցի վերաբերյալ որևէ սահմանափակում չի լինելու և հանրաքվեին մասնակցելու են մինչև 1988 թվականը Լեռնային Ղարաբաղում ապրած մարդիկ՝ հայերի ու ադրբեջանցիների թվային համամասնությունը պահպանելով ըստ մինչև հակամարտությունը անցկացված ԽՍՀՄ վերջին մարդահամարի: Երկրորդը սահմանում էր, որ մինչև վերջնական կարգավիճակի որոշումը Լեռնային Ղարաբաղը պետք է ունենա միջանկյալ կարգավիճակ: Դրա հիման վրա Արցախի ժողովրդի համար սահմանվում էին քաղաքական ու տնտեսական կենսունակությունն ու անվտանգությունն ապահովող իրավունքներ՝ ընտրել օրենսդիր և գործադիր մարմիններ, հիմնել դատարաններ, մասնակցել իրենց վերաբերող ԵԱՀԿ նիստերին, ստանալ օգնություն և ուղիղ օտաերկրյա ներդրումներ և այլն: Միթե ողջամիտ որևէ մեկը կարող է այս ամենն ընկալել որպես պատկանելություն Ադրբեջանին: Մի փնտրեք հակամարտության կարգավորման գործընթացին առնչվող որևէ փաստաթուղթ, որը արձանագրել է, որ Արցախը Ադրբեջանի մաս է: Նման փաստաթուղթ պարզապես չկա: Եթե նման բան լիներ, ապա նման խնդիրների լուծմամբ երբևէ չգրադված ու համապատասխան գիտելիքներ չունեցող Էմանուել Մակրոնն ու Շառլ Միշելը, հենց դա կօգտագործեին 2021 թվականին Բրյուսելում Հայաստանի ներկայացուցչին նման գաղափար ներշնչելու համար, այլ ոչ թե կվկայակոչեին Ալմա Աթայի կես էջանոց հոչակագիրը՝ ԱՊՀ-ն ձևավորելու մասին, որը ոչ մի կապ չունի հակամարտության կարգավորման հետ: Մինչդեռ ճիշտ հակառակն է՝ այն արձանագրում է, որ ԱՊՀ անդամ պետությունները հարգում են միջազգային իրավունքի հիմնարար սկզբունքները, այդ թվում և ինքնորոշման իրավունքը:

Ակնհայտ է, որ այս պնդումը բացարձակ կամ աճապարարություն է, կամ կեղծիք՝ Բրյուսելի կործանարար հայտարարությունը արդարացնելու համար:

Պնդում 2.

Բանակցային փաստաթղթերում նշվել է, որ Շուշին վերադարձվելու է Ադրբեջանին:

Միթե կառավարությունում որևէ մեկը հակամարտության կարգավորման վերաբերող այս կամ չիրապարակված որևէ փաստաթղթում Շուշի բառ է տեսել: Այս փաթեթի հրապարակումից հետո մնում է երկու ճանապարհ. Կամ մատնանշել այդ փաստաթղթի համապատասխան էջը, կամ դիմել համապատասխան հաստատություններ՝ տեսողության հետ կապված գանգատներով:

Ակնհայտ է, որ այս պնդումը ևս բացարձակ կեղծիք է և աճապարարություն:

Պնդում 3.

Բանակցային փաստաթղթերում ինքնորոշման իրավունքը նշվել է Ադրբեջանի տարածքային ամբողջականության ներքո:

Երբ Ադրբեջանը հասկացավ, որ կոպիտ սխալ է թույլ տվել՝ 2008 թվականին ստորագրելով Մայենդորֆյան փաստաթուղթը՝ հակամարտությունը միջազգային իրավունքի շրջանակներում լուծելու և դրա հիման վրա՝ 2009 թվականին ստորագրելով համանախագահների ու Հայաստանի և Ադրբեջանի արտգործնախարարների հայտարարությունը, որի համաձայն հակամարտությունը պետք է կարգավորել Մադրիդյան սկզբունքների հիման վրա, փորձեց շրջանառել մի տգետ ու անհեթեթ թեզ, թե իբր ինքնորոշումը պետք է կիրառվի Ադրբեջանի տարածքային ամբողջականության ներքո: Յավոք, հետագայում որոշ հայ քաղաքական գործիչներ ճղճիմ ներքաղաքական նկրտումների կամ տգիտության պատճառով որոշ ժամանակ կրկնում էին այդ ցնորամտությունը: Միջազգային իրավունքը հստակորեն սահմանել է, որ ինքնորոշման իրավունքը վերաբերում է ինքնորոշվող ժողովրդի ու մետրոպոլիայի հարաբերություններին, իսկ տարածքային ամբողջականությունը՝ ճանաչված (ՄԱԿ-ի անդամ) պետությունների միջև հարաբերությունների կարգավորմանը: Վերջին սկզբունքը սահմանում է, որ ՄԱԿ անդամ երկրներից որևէ մեկն իրավունք չունի այլ անդամ երկրի տարածքից որևէ մաս անջատել և միացնել իրեն: Եվ միջազգային ասպարեզում, և՛ անգամ Հայաստանում առկա են բազմաթիվ և չհերքված գիտական հրապարակումներ, որոնք անվերապահորեն ապացուցում են, որ ինքնորոշման իրավունքն ու

տարածքային ամբողջականությունը որևէ առնչություն ունենալ չեն կարող և չեն կարող միմյանց հակադրվել:

նինքնորոշման իրավունքին կամ տգիտության, կամ քաղաքական ցինիզմի պատճառով՝ պրիմիտիվ կեղծիքի նպատակով: Անգամ Ադրբեջանը, մի քանի տարի դա անելուց հետո, տեսավ դրա անհեռանկարայնությունն ու հրաժարվեց դրանից: Հայաստանի իշխանությունները փորձում են վերակենդանացնել ադրբեջանական մեռած թեզը:

Այս պնդումը ոչ միայն բացարձակապես անհիմն է ու կեղծ, այլև հավաստում է այն պնդողի քծնանքը Ադրբեջանին: Հետևաբար պնդում 3-ը ոչ մի կապ չունի հրապարակված փաստաթղթերի հետ:

Պնդում 4.

Բանակցային փաստաթղթերում Արցախի կարգավիճակի վերաբերյալ հանրաքվեն պետք է տեղի ունենար ոչ միայն Արցախում, այլ նաև Ադրբեջանի ողջ տարածքում:

Այս փաստաթղթում սևով սպիտակի վրա գրված է «Окончательный правовой статус Нагорного Карабаха (НК) будет определен путем плебисцита, выражающего свободное и подлинное волеизъявление населения НК. Под населением НК понимаются лица любой национальности, проживавшие в НК в 1988г., в тех же пропорциях армянских и азербайджанских общин, которые существовали до начала конфликта». Հրապարակված մյուս՝ Վազանյան 2011, 2016 և 2019 թվականների փաստաթղթերում ավելի հստակեցված է. «Окончательный правовой статус Нагорного Карабаха (НК) будет определен путем проведения под эгидой ООН или ОБСЕ всенародного голосования, выражающего свободное волеизъявление населения НК и имеющего юридически обязательный характер в соответствии с нормами и принципами международного права».

Միթե որևէ ողջամիտ և ռուսերենի (կառավարությունն է տեղադրել փաստաթղթի ռուսերեն տարբերակը) տարրական գիտելիքներ ունեցող մարդ կարող է չհասկանալ, որ խոսքը Լեռնային Ղարաբաղում ապրող բնակչության կամարտահայտության մասին է:

Հետևաբար, այս պնդումը ևս ոչ մի փաստաթղթային հիմնավորում չունի:

Պնդում 5.

Իրենք ժառանգել են տապալված գործընթաց, այդ պատճառով մերժել են այն ի սկզբանե և այլն:

Լեռնային Ղարաբաղի հակամարտության կարգավորման վերաբերյալ ներկայիս իշխանության ստացած ժառանգությունը գնահատելու համար պետք է մանրամասն անդրադառնալ բանակցային փաստաթղթի 2019 թվականի հունիսին համանախագահների ներկայացրած փաթեթին: Միգուցե բանակցային փաստաթղթում ինչ որ բաներ փոխվել էին՝ ի վնաս Հայաստանի:

Կարգավորման գործընթացի 2019 թվականի հունիսի բանակցային փաթեթը

Քննարկվող հարցերի կապակցությամբ այս փաթեթն ունի առանցքային նշանակություն, քանի որ կապող փաստաթուղթ է նախորդ իշխանությունների և ներկայիս իշխանության կառավարման շրջանների միջև:

Նախ հեշտ է նկատել, որ 2007 թվականի Մադրիդյան սկզբունքների և 2019 թվականի փաստաթղթի միջև կան էական, այդ թվում և կառուցվածքային տարբերություններ: Խնդիրը միայն այն չէ, որ առաջինը բաղկացած էր մեկ փաստաթղթից, երկրորդը՝ երեք: Ընդ որում, այդ տարբերությունը միայն քանակական չէ, այլ վկայում է գործընթացի զգալի զարգացումների մասին: 2007թ. փաստաթղթի՝ կարգավորման սկզբունքների վերջին՝ 13-րդ և 14-րդ կետերում սոսկ մեկական նախադասությամբ արձանագրվում էր, որ «կողմերը, համանախագահների աջակցությամբ կդիմեն ՄԱԿ Անվտանգության խորհրդին՝ Խաղաղության համաձայնագիրը հավանության արժանացնելու և մինչև Լեռնային Ղարաբաղի վերջնական կարգավիճակի որոշումը Լեռնային Ղարաբաղի ժողովրդի իրավունքների պաշտպանության երաշխավորությունը հավաստող բանաձևի ընդունման համար» և «կխնդրեն ԵԱՀԿ-ին ու ՄԱԿ-ին՝ անհրաժեշտության դեպքում համապատասխան միջոցներ ձեռք առնել՝ ՄԱԿ կանոնադրության համաձայն»: Մինչդեռ 2019թ. փաթեթում արդեն առկա են երեք փաստաթղթեր՝ Կարգավորման առաջին փուլի և հետագա քայլերի մասին հռչակագիր, Համանախագահների հայտարարության նախագիծ, որով նրանք աջակցություն են հայտնում այդ հռչակագրի իրականացմանը և 13 կետ պարունակող ՄԱԿ Անվտանգության խորհրդի բանաձևի նախագիծ, որը, ըստ փաստաթղթի թվագրման, մշակվել էր դեռևս 2016 թվականին: Դա տրամաբանորեն վկայում է, որ այդ ժամանակ առկա է եղել նաև համապատասխան գլխավոր փաստաթուղթը՝ Կարգավորման հռչակագիրը, որը մինչև 2019թ. կրել է որոշ խմբագրական փոփոխություններ, սակայն ոչ էական, քանի որ այդ դեպքում նման փոփոխություններ կկրեր նաև ՄԱԿ Անվտանգության խորհրդի բանաձևի նախագիծը: Իսկ այդ ամենը վկայում է, որ

արդեն 2016 թվականին համանախագահները կարծում էին, որ լուծումը մոտ է և մշակել էին փաստաթղթերի ամբողջական փաթեթը: Ավելին, կարելի է նկատել, որ համանախագահները 2016 թվականի քառօրյա պատերազմից հետո կարող էին գնալ այն ճանապարհով, որով գնացել են դրական ավարտ ունեցած ինքնորոշման հակամարտությունները՝ մետրոպոլիայի կողմից ռազմական գործողությունների վերսկսումից հետո դրանք միջազգային ճնշումներով դադարեցվում են, և պարտադրվում են միջազգային իրավունքով սահմանված լուծումներ:

Քանի որ կառավարության հրապարակած փաթեթը պարունակում է նաև 2016 թվականի փաստաթղթերը, ապա 2019 թվականի փաթեթի հիման վրա արված ենթադրությունները կարելի է ստուգել այդ փաստաթղթերի հիման վրա: 2016 և 2019 թվականների փաթեթների համեմատությունը հաստատում է վերը բերված եզրակացությունները: Երկու հռչակագրերի համեմատությունը բացահայտում է հետևյալ տարբերությունները.

- 2019-ի հռչակագրի նախաբանը՝ 2016-ի համեմատ, մի փոքր թեթևացվել է՝ հեռացնելով որոշ պատմական հաստատագրումներ:

- Առաջին էջում «Լեռնային Ղարաբաղի ամբողջ բնակչություն» արտահայտությունից հանվել է «ամբողջ» բառը, որն այդ արտահայտության մեջ որևէ լրացուցիչ իմաստ չէր արտահայտում (քանի որ հրապարակվել են ոչ թե բուն փաստաթղթերը՝ անգլերեն լեզվով, այլ դրանց թարգմանությունները ռուսերեն, հնարավոր է, որ այդ բառի հետ կապված առկա է պարզապես թարգմանության տարբերություն):

- Առաջին էջում թավ ավելացվել է մի փոքր պարզաբանում՝ 2019-ի փաստաթուղթ է վերադարձվել մի ձևակերպում, որը 2007-ի փաստաթղթում կար, բայց 2016-ից դուրս էր մնացել. «քվեարկության դրվող հարցը կամ հարցերը ոչ մի կերպ չեն սահմանափակվելու, ցանկացած արդյունք կողմերը կհարգեն»:

Ուշադրության արժանի է նաև այն փաստը, որ սկզբնական շրջանում (2007 թվականից սկսած) քննարկվող փաստաթուղթը Հակամարտության կարգավորման սկզբունքներ էր կոչվում, իսկ 2019 (2016) թվականին՝ Հռչակագիր կարգավորման առաջին փուլի մասին, որի հիման վրա հետագայում պետք է կնքվեր միջպետական պայմանագիր, ինչը նշանակում է, որ նախկինում ձևավորված կարգավորման սկզբունքներն այդ հռչակագրի դրույթների մանրամասներ էին պարունակում:

Նշված տարբերությունների ոչ էական բնույթը անուղղակի հաստատում է այն հանգամանքը, որ գլխավոր փաստաթղթերը՝ ՄԱԿ Անվտանգության խորհրդի բանաձևերի նախագծերը, նույնն են 2016-ի և 2019-ի փաթեթներում:

Հետևաբար, պարզելու համար կառավարության ղեկավարի պնդումների համապատասխանությունը 2016-ի և 2019-ի փաթեթներին, մնում է բացահայտել, թե ինչ փոփոխություններ է կրել բանակցային փաստաթուղթը 2007-ից մինչև 2019 (2016) թվականները:

Պնդում 1.

Բանակցային փաստաթղթերում միշտ նշվել է Արցախի պատկանելությունը Ադրբեջանին:

Ինչպես 2007թ. փաստաթղթում, 2016-ի և 2019-ի փաստաթղթերում էլ որևէ ձևակերպում չկա, որով Արցախը համարվում է Ադրբեջանի մաս: Ճիշտ հակառակը, բոլոր այդ փաստաթղթերն էլ արձանագրում են Արցախի ինքնորոշման իրավունքը և կարգավորման գլխավոր նպատակներից են համարում այդ իրավունքի իրացումը:

Ավելին, 2016 և 2019 թվականների փաթեթները մանրամասնում ու ամրապնդում են այդ մոտեցումը: Մասնավորապես, արձանագրվում է, որ.

-Կարգավորման նպատակների իրագործումը պահանջում է գործողությունների հաջորդականությունը համաձայնեցնել Լեռնային Ղարաբաղի բնակչության հետ և հաշվի առնել նրանց շահերը:

-Հինգ շրջանները կարող են վերադարձվել Ադրբեջանին միայն ՄԱԿ Անվտանգության խորհրդի բանաձևի հիման վրա Խաղաղության պահպանման միջազգային ուժերի տեղակայումից հետո, որոնց մանդատի որոշումը, այդ թվում և արձագանքը կողմերից որևէ մեկի խախտումներին, որոշվելու է այդ բանաձևով:

-Արցախի ներկայացուցիչները պետք է մասնակցեն խաղաղության պայմանագրի մշակմանը և այլն:

Ակնհայտ է, որ 2019 (2016)-ի փաթեթը ապահովում էր միջազգային իրավունքի հիման վրա Արցախի ինքնորոշման իրավունքի իրացում՝ զգալիորեն մանրամասնելով ու ամրապնդելով դրա երաշխիքները:

Հետևաբար, կեղծիք է այն պնդումը, թե բանակցային փաստաթղթերով Արցախը համարվել է Ադրբեջանի մաս:

Պնդում 2.

Բանակցային փաստաթղթերում նշվել է, որ Շուշին վերադարձվելու է Ադրբեջանին,

Ինչպես 2007 թվականի փաստաթղթում, այնպես էլ կարգավորման բանակցային գործընթացի մյուս բոլոր փաստաթղթերում Շուշիի որևէ հիշատակում չկա:

Հետևաբար պնդում 2-ը անհիմն է ու կեղծիք:

Պնդում 3.

Բանակցային փաստաթղթերում ինքնորոշման իրավունքը նշվել է Ադրբեյջանի տարածքային ամբողջականության ներքո:

Ոչ միայն բանակցային բոլոր փաստաթղթերում, այդ թվում և 2016-ի ու 2019-ի փաթեթներում, նման դրույթ չկա, այլև չի կարող լինել, քանի որ հակասում է միջազգային իրավունքի հիմնարար սկզբունքներին ու հիմնական փաստաթղթերին:

Նման պնդումը սխալ է ու կեղծ, լավագույն դեպքում՝ միջազգային իրավունքի չիմացություն:

Պնդում 4.

Բանակցային փաստաթղթերում Արցախի կարգավիճակի վերաբերյալ հանրաքվեն պետք է տեղի ունենար ոչ միայն Արցախում, այլ նաև Ադրբեյջանի ողջ տարածքում:

2016-ի և 2019-ի փաստաթղթերում ևս հստակորեն ամրագրված է, որ «Լեռնային Ղարաբաղի վերջնական կարգավիճակի վերաբերյալ պետք է անցկացվի համաժողովրդական քվեարկություն, որը կարտահայտի Լեռնային Ղարաբաղի ժողովրդի ազատ կամարտահայտությունը և կունենա իրավականորեն պարտադիր բնույթ»: Որևէ ողջամիտ մարդ չի կարող այս արտահայտությունն ընկալել որպես այլ բան, քան Լեռնային Ղարաբաղի ժողովրդի հանրաքվե:

Այս պնդումը ևս կեղծ է ու ձեռնածություն:

Պնդում 5.

Իրենք ժառանգել են տապալված գործընթաց, այդ պատճառով մերժել են այն ի սկզբանե և այլն:

2016 թվականի փաթեթից միայն փոքր, ոչ էական խմբագրումներով տարբերվող 2019-ի փաթեթը, որը առաջարկվել է կառավարությանը, նախատեսում էր, ինչպես 2016թ. փաստաթուղթը,

- 2007 թվականից սկսած միջազգային ատյաններում հաստատված Լեռնային Ղարաբաղի ժողովրդի ինքնորոշման իրավունքի իրացում, որի արդյունքում Լեռնային Ղարաբաղի Հանրապետությունը կդառնար միջազգայնորեն ճանաչված պետություն՝ ՄԱԿ-ի անդամ:

- Լեռնային Ղարաբաղի Հանրապետության անվտանգության երաշխավորները կլինեին ՄԱԿ-ի Անվտանգության խորհուրդը, երեք համանախագահ երկրները և Հայաստանը:

- Անվտանգության ապահովումը կիրականացնեին ՄԱԿ Անվտանգության խորհրդի բանաձևի հիման վրա ձևավորված Խաղաղության պահպանման միջազգային ուժերը, որոնց մանդատը, այդ թվում և արձագանքը կողմերից որևէ մեկի խախտումներին, որոշվելու էր այդ բանաձևով:

- Արցախին սահմանակից ադրբեջանական շրջանները լինելու էին ապառազականացված գոտիներ:

- Արդեն իսկ միջանկյալ կարգավիճակով ճանաչվելու էին Արցախի գործադիր ու օրենսդիր մարմինները, դատարանները, ինքնապաշտպանական ուժերը, միջազգային ուղիղ ներդրումները և Արցախի լիարժեք քաղաքական ու տնտեսական կենսագործունեության ու անվտանգության ապահովման մարմիններն ու գործընթացները: Այս իրավունքները թույլ էին տալու ապահովել Արցախի ղեկավարության ու պաշտպանության բանակի միջազգային պաշտպանվածությունը Ադրբեջանի նկրտումներից և այլն:

Սա էր Լեռնային Ղարաբաղի հակամարտության կարգավորման հարցում այս իշխանությունների ստացած ժառանգությունը, որին հասնելու համար պահանջվել էր 18 տարիների բարդ աշխատանքի արդյունք: Անգամ կառավարության հրապարակած փաստաթղթերի խիստ թերի փաթեթի վերլուծությունը վկայում է, որ թեև դրան նախորդել էր անբարենպաստ շրջան, քանի որ 90-ական թվականներին համանախագահներն առաջարկում էին բանակցային փաստաթղթի տարբերակներ, որոնք չէին նախատեսում Արցախի ինքնորոշման իրավունքի կիրառում, հետևաբար՝ Արցախի անկախություն, սակայն շարունակական աշխատանքի արդյունքում հաջողվեց բանակցային գործընթացը տեղափոխել միջազգային իրավունքի հարթություն՝ ինքնորոշման իրավունքի կիրառման հիման վրա:

Սակայն ինչ արեց այդ ժառանգությունը ստացած իշխանությունը: Հրաժարվեց վերը թվարկված արդյունքներն ապահովող բանակցային փաստաթղթից՝ հայտարարելով իր կետից գործընթացը սկսելու մասին: Հետևեց անհեթեթ մեկնաբանությունների ու «գաղափարների» շքերթ, որի գագաթնակետն էր այսպես կոչված «Մյունխենյան սկզբունքները»՝ Մադրիդյան սկզբունքների փոխարեն, որին լուրջ չվերաբերվեց որևէ մեկը: Ի դեպ, «Մյունխենյան սկզբունքների» առանցքային

գաղափարն էր՝ լուծումը պետք ընդունելի լինի Հայաստանի, Արցախի ու Ադրբեջանի ժողովուրդների համար:

Ակնհայտ էր, որ համանախագահ պետությունները չէին հանդուրժելու այդ ամբարտաւան ու անլուրջ պահվածքը: Երբ այդ պահվածքն ու բանակցությունների տապալումը դարձնելով պատրվակ՝ սանձազերծվեց ադրբեջանաթուրքական ռազմական ագրեսիա, պարզվեց, որ նույն տրամաբանությունն ու գործելավորը կիրառվում է նաև պատերազմական իրավիճակում: Մինչև կապիտուլյացիայի օրը պետական քարոզչամեքենան սուտ ու կեղծիք էր տարածում: Արդյունքում՝ լիակատար կապիտուլյացիա, որը շարունակվում է նաև «խաղաղության» պայմաններում, 5000 զոհ, հազարավոր վիրավորներ, Արցախում թշնամու իրականացրած էթնիկ զտումներ ու ցեղասպանություն, միջազգային հարաբերություններում դերակատարության լիակատար կորուստ, առանց կանոնակարգման «սահմանազատում», բանակի ջախջախում, Հայաստանի տարածքի 200 քառակուսի կիլոմետրի օկուպացիա ադրբեջանական բանակի կողմից, ահռելի պետական պարտք և այլն, և այլն: Ստացվում է, որ, ըստ Հայաստանի կառավարության, Հայաստանի և Արցախի ժողովուրդների համար ընդունելի էր սա, այլ ոչ թե 2019 թվականի բանակցային փաթեթի վերոհիշյալ ձեռքբերումները:

Ակնհայտ է, որ 5-րդ պնդումն էլ կեղծիք է ու աճապարարություն:

Փաստերն ու հրապարակված փաստաթղթերը հաստատում են, որ Լեռնային Ղարաբաղի հակամարտության կարգավորման գործընթացի վերաբերյալ այս իշխանության սրացած ժառանգության՝ 2019 թվականի փաթեթի ցանկալի հետևանքներն ի չիք են դարձվել կարգավորման գործընթացի տապալմամբ, ինչը հանգեցրել է պատերազմի ու դրա աղետալի հետևանքների:

Բայց պարզվում է, որ աճապարարությունը սահմաններ չունի: Դեկտեմբերի 2-ին փաթեթը հրապարակելուց մեկ օր անց Ազգային ժողովում հարց ու պատասխանի ժամանակ ոչ թե մատնացույց արվեցին վերը նշված 5 պնդումների կապը հրապարակված փաստաթղթերի հետ՝ փաստորեն հաստատելով, որ այդ պնդումները կեղծիք են և կապ չունեն փաստաթղթերի հետ, այլ առաջադրվեցին նոր պնդումներ:

Թերևս արժե այդ պնդումներին ևս անդրադառնալ՝ հրապարակված փաստաթղթերի հիման վրա:

Պնդում 6.

Եթե կար տարբերակ՝ լուծելու Ղարաբաղի հարցը այնպես, որ Լեռնային Ղարաբաղը մնա հայկական, ապա թող ձեր ղեկավարները որոշեին նախորդ ժամանակաշրջաններում:

Սա, լավագույն դեպքում, «միամիտ» պնդում է: Ինքնորոշման հակամարտությունների բանակցությունները տևում են տասնամյակներ, և դրանք չի լուծում մեկ կողմն ու միանգամից: Այդ տասնամյակների ընթացքում բանակցային փաստաթղթի վրա արվում է մանրակրկիտ ու տևական աշխատանք: Դա ակնհայտորեն երևում է 2007 և 2019 (2016) թվականների փաստաթղթերը համեմատելիս: Երբ այդ աշխատանքը մոտենում է ավարտին և մետրոպոլիան վերսկսում է պատերազմական գործողությունները, այդ փաստաթղթի հիման վրա ՄԱԿ Անվտանգության խորհուրդը պարտադրում է լուծում: Բոլոր ինքնորոշման հակամարտությունների դեպքում, երբ եղել է օրինական լուծում, ճանապարհը եղել է դա: Հետևաբար, կարևոր էր փաստաթղթում ամրագրել ինքնորոշման իրավունքի իրացումը և անվտանգության մեխանիզմների ապահովումը, ինչը հաջողվել է անել 2019 (2016)-ի փաստաթղթում: Կարելի է ենթադրել, որ 2017-2018 թվականների ընտրական ցիկլի ավարտից հետո այդպես էլ կլինեք, քանի որ 2016 թվականին Ադրբեյջանը վերսկսել էր ռազմական ագրեսիան, որը համանախագահների կոշտ միջամտությամբ 4 օրում դադարեցվել էր: Ակնհայտ է, որ միջնորդները ընտրական ցիկլի ընթացքում որոշիչ գործողություններ երբեք չեն անում ու պետք է սպասեին 2018-ի երկրորդ կեսին: Բայց 2018-ի առաջին կեսին տեղի ունեցավ հակասահմանադրական իշխանափոխություն և նոր իշխանությունները խափանեցին կարգավորման գործընթացը:

Հետևաբար այս պնդումը կեղծ է և հեղուկ է կամ հակամարտությունների կարգավորման տրամաբանության վերաբերյալ գիտելիքների բացակայության, կամ պարզապես, պարզունակ ինքնաարդարացում է:

Պնդում 7.

Լեռնային Ղարաբաղի հարցը լուծվել է 1996թ., պարզապես ոչ ոք մեզ այդ մասին չէր ասել:

Սա ակնհայտ կեղծիք է: Իրականությունն այն է, որ կարգավորման գործընթացի 90-ական թվականների փուլը ավարտվել է 2000-ականների սկզբին և նոր փուլ է սկսվել ինքնորոշման իրավունքի հիման վրա, երբ համանախագահները ներկայացրել են սկզբունքորեն նոր բանակցային փաստաթուղթ՝ Մադրիդյան սկզբունքները: Միթե ակնհայտ չէ, որ եթե լուծվել էր, ապա ինչո՞ւ էին աշխարհի 5

ամենաազդեցիկ երկրներից երեքի՝ ԱՄՆ-ի, Ռուսաստանի ու Ֆրանսիայի ներկայացուցիչ համանախագահները բերում նոր որակի բանակցային փաստաթուղթ ու կազմակերպում բանակցություններ ավելի քան 20 տարի: Իսկ ազդեցիկ միջազգային կազմակերպությունները՝ ՄԱԿ-ը, Եվրամիությունը, Եվրոպայի խորհուրդը, ԵԱՀԿ-ն այդ ընթացքում անվերապահորեն պաշտպանում էին Մինսկի խմբի շրջանակներում Մադրիդյան սկզբունքների հիման վրա հակամարտության կարգավորման սխեման: Անլուրջ ենթադրություններն ու վերաբերմունքը կենսական խնդիրներին, դրանց հետ կապված գործընթացներին ու ազդեցիկ պետություններին հանգեցնում է աղետների, ինչ տեղի ունեցավ 2018-2023 թվականներին:

Հրապարակված փաստաթղթերը հաստատում են, որ երկրորդ փուլում տեղի են ունեցել 2 տասնամյակ տևած բարդ ու մանրակրկիտ բանակցություններ, և 7-րդ պնդումը պարզապես կեղծ է ու կապ չունի իրականության հետ:

Պնդում 8.

Գրված է համաժողովրդական հանրաքվե, որն արտահայտում է ԼՂ ամբողջ բնակչության կամարտահայտությունը: Մեկնաբանությունը եղել է այն, և դուք կարող եք տեսնել նույն փաթեթում հրապարակված Սերժ Սարգսյանի նամակում դրա ակնարկը, որ ենթադրվող հանրաքվեն ըստ Ադրբեյջանի՝ պետք է տեղի ունենա Ադրբեյջանի ամբողջ տարածքում: Ինչ է նշանակում ԼՂ ամբողջ բնակչություն: Նշանակում է նաև ԼՂ ադրբեյջանական համայնքը:

Փաստաթղթերում չգտնելով որևէ հիմնավորում, որ իբր հանրաքվեն պետք է անցկացվեր Ադրբեյջանի տարածքում, օգտագործվում է «ակնարկը, որ ենթադրվող հանրաքվեն, **ըստ Ադրբեյջանի**, պետք է տեղի ունենա Ադրբեյջանի ամբողջ տարածքում»: Այսինքն՝ Հայաստանի կառավարության համար Ադրբեյջանի կարծիքը վեր է փաստաթղթերի ձևակերպումներից:

Այս պնդումը ևս որևէ փաստաթղթային հիմնարկություն չունի, պարզապես հաստատում է, որ Հայաստանի կառավարության համար ճշմարտության արժեք ունեն Ադրբեյջանի կեղծիքներն ու աճապարարությունները:

Պնդում 9.

Ես տվել եմ հարցը, թե այս փաթեթով ԼՂ-ն կարո՞ղ է չլինել Ադրբեյջանի կազմում, և ստացել պատասխանը, որ կարող է, եթե Ադրբեյջանը համաձայնի: Բոլոր փաթեթներով նախատեսված է եղել այդ պահին ԼՂ գոյություն ունեցող կարգավիճակի լուծարում:

Իհարկե, եթե փաստաթղթերը հաստատենին կողմերը, այդ պահի՝ չճանաչվածության կարգավիճակը կվերանար, ու կհաստատվեր միջանկյալ կարգավիճակ, որը Արցախի համար կլիներ անհամեմատ ավելի լավ, քան մինչ այդ էր: Դա հեշտ է տեսնել վերևում՝ 2007, 2016, 2019 թվականների փաստաթղթերի վերլուծությունից:

Ինչ վերաբերում է Ադրբեջանի համաձայնությանը, ապա այդ փաստաթղթի ընդունումը ենթադրում էր, որ այն բոլոր կողմերը համաձայն լինեն՝ ստորագրեն: Բայց հակամարտությունների կարգավորման գործընթացների պրակտիկային ծանոթ չլինելը հանգեցրել է սխալ եզրակացության: Երբ, ի վերջո, պարզվում է, որ մետրոպոլիան չի ցանկանում ստորագրել փաստաթուղթը, այսինքն՝ տապալում է բանակցությունները կամ վերսկսում է ռազմական ագրեսիան, միջազգային հանրությունը՝ ՄԱԿ-ը պարտադրում է լուծում միջազգային իրավունքի՝ բանակցային փաստաթղթի վերջնական տարբերակի հիման վրա: Դեռ որևէ ինքնորոշման հակամարտությունում մետրոպոլիան չի համաձայնել ինքնորոշվող կողմի անկախությանը: Բայց մի շարք դեպքերում՝ Կոսովո, Արևելյան Թիմոր, Հարավային Սուդան և այլն, կիրառվել է պարտադրված լուծում միջազգային իրավունքի հիման վրա: Քանի որ Լեռնային Ղարաբաղի բանակցային փաստաթուղթը ևս հիմնված էր միջազգային իրավունքի վրա, ապա այս դեպքում նույնպես, եթե Ադրբեջանը հրաժարվեր ստորագրել, կկիրառվեր պարտադրված լուծում՝ 2019 թվականի փաստաթղթի հիման վրա:

Ակնհայտ է, որ, չքաջառելով այլ հանգամանքներ, 2018 թվականից սկսած, միջազգային իրավունքի հիմնարար փաստաթղթերի, հակամարտությունների կարգավորման գործընթացների ու փորձի չիմացությունը Հայաստանի կառավարությանը տարել է ծուղակ՝ կարգավորման գործընթացի խափանում: Դա Ադրբեջանի միակ հնարավորությունն էր՝ խուսափելու 2019 թվականի փաստաթղթի հիման վրա ՄԱԿ-ի պարտադրած լուծումից, որի իրացման արդյունքում Արցախը դառնալու էր ՄԱԿ-ի անդամ անկախ պետություն:

Պնդում 10.

2019 թվականի հունիսի թուղթը դա է: Երբ որ ես ասել եմ՝ ինձ ասեք, դժվար է սեղմագիրը նախորդող շրջանի: Համանախագահները դա տվել են որպես նախորդող շրջանի բանակցային սեղմագիր, և այդ համապեքստում է, որ ես հարց եմ տվել, ասել եմ՝ լավ, ես կարդում եմ, հիմա ինձ հեղափոխություն է ձեր մեկնաբանությունը, հիմա այս փաթեթներով կարող է Ղարաբաղը չլինել Ադրբեջանի կազմում: Հնչել է շատ հստակ պատասխան՝ այո, եթե Ադրբեջանը համաձայնի: Սա նաև գրված է, բայց նոր մարդ ես, մտածում ես գրածը կարող է ճիշտ չես մեկնաբանում:

Այս պնդումը ևս հաստատում է բանակցային գործընթացի մասին պատկերացումների բացակայության մասին: Նման գործընթացներում պարզապես անլուրջ է համանախագահներից «սեղմագիր» պահանջելը և դրա հիման վրա գործընթացի ու փաստաթղթերի մասին դատողություններ անելը: Փաստաթղթում յուրաքանչյուր բառ կարևոր է, ու պետք էր ոչ թե սրան-նրան հարցեր տալ, այլ ունենալ անհրաժեշտ գիտելիքներ միջազգային իրավունքի մասին և կարողանալ փաստաթղթերը ինքնուրույն, սեփական մասնագետների միջոցով վերլուծել, բացահայտել վտանգները, եթե դրանք կան, ու հետևողական աշխատանքով շտկել: Միջնորդները կողմերի համար մասնագիտական խորհուրդներ կամ մեկնաբանություններ տալու պարտականություն չունեն:

Ցավոք, այս պնդումը ևս վկայում է բանակցությունների նկատմամբ անլուրջ վերաբերմունքի ու մասնագիտական աշխատանքի բացակայության մասին, որի հետևանքը եղավ տեղի ունեցած աղետը:

Քանի որ խնդիրը վերաբերում է կարևոր փաստաթղթերի, որոնց մասին թյուր պատկերացումները հանգեցրել են Արցախի ու Հայաստանի Հանրապետության համար աղետալի հետևանքների, հարցին վերջակետ դնելու համար կարելի էր կազմակերպել ոչ թե խորհրդարանական լեզվակռիվ, այլ մասնագիտական քննարկում: Հրապարակված փաստաթղթերի հիման վրա վերը բերված վերլուծությունը ցույց է տալիս, որ քննարկված բոլոր 10 պնդումներն էլ անհիմն են և կապ չունեն այդ փաստաթղթերի հետ: Եթե դրանք համապատասխանեին իրականությանը, ապա փաստաթղթերի հիման վրա կբերվեր պնդումների որևէ հիմնավորում:

Կառավարության կողմից փաստաթղթերի հրապարակման նպատակը եղել է ոչ թե դրանց հիման վրա պնդումների հավաստիության ցուցադրումը, ինչը հայտարարվել էր, այլ հասարակ քաղաքացիների վրա կեղծ տպավորություն գործելը, քանի որ նրանց համար դժվար կլիներ դրանք կարդալ՝ առանց մասնագիտական գիտելիքների:

«ԼՈՒՅՍ հիմնադրամ» գրառմամբ հրապարակված նյութը պաշտպանված է ՀՀ օրենսդրությամբ և միջազգային համաձայնագրերով: Հրապարակված նյութի բոլոր իրավունքների բացառիկ իրավատերը **«ԼՈՒՅՍ»** հիմնադրամն է:

Նյութի ամբողջական կամ դրանից քաղվածքների վերարտադրումը թույլատրվում է իրականացնել միայն **«ԼՈՒՅՍ հիմնադրամ»** գրառման և համապատասխան **ակտիվ հղման** տեղադրման պայմանով՝ պահպանելով «ԼՈՒՅՍ» հիմնադրամին պատկանող նյութերի օգտագործման կարգը: